

UNIVERZITET U NOVOM PAZARU
Savjet Univerziteta
Broj: 682/22/IV-2
Novi Pazar, 23.06.2022. godine

Na osnovu člana 41. i 42. Statuta Univerziteta u Novom Pazaru, na sjednici održanoj dana **23.06.2022.** godine, Savjet Univerziteta donio je **odluku** o usvajanju –

P R A V I L N I K A
o dodjeli stipendija studentima
Univerziteta u Novom Pazaru

OPŠTE ODREDBE

Član 1.

Ovim Pravilnikom propisuju se osnovi, kriteriji i pravila dodjeljivanja prava na stipendiju u vidu popusta na školarinu studentima osnovnih, master i doktorskih studija Univerziteta u Novom Pazaru (u daljem tekstu: Univerzitet), odnosno prava i obaveze Univerziteta i studenata kao korisnika stipendija.

Pravo na određeni procenat stipendije, odnosno popusta na školarinu imaju domaći i strani državljani bez razlika u osnovima za sticanje stipendije.

Član 2.

U skladu sa Zakonom o visokom obrazovanju i Statutom Univerziteta, Univerzitet obezbjeđuje sredstva za stipendiranje iz vlastitog budžeta, kao i donacijama partnerskih ustanova i organizacija.

Stipendija koja se dodjeljuje studentu ne uključuje naknadu za sljedeće troškove:

1. upisni materijal, uvjerenja o statusu studenta i položenim ispitima,
2. troškovi raznih potvrda koje se izdaju na zahtjev studenata,
3. kupovina ili iznajmljivanje knjiga,
4. troškovi učešća u raznim kursevima i obukama za koje se dobijaju posebni sertifikati i koji nisu dio redovne nastave,
5. troškovi prijave i odbrane završnih radova,
6. troškovi izrade diploma za sve cikluse studija,
7. troškovi ponovljene prijave za ispit iz istog predmeta,
8. troškovi odobravanja zahtjeva za mirovanje prava i obaveza,
9. administrativni troškovi za ovjeru tekućeg semestra,
10. troškovi priznavanja pojedinačnih predmeta za transfer studenta,
11. troškovi odobravanja zahtjeva za nastavak studija u okviru drugog studijskog programa na Univerzitetu (interni transfer),
12. troškovi ispisa sa Univerziteta.
13. troškovi za smještaj, ishranu, prijevoz, školski pribor,
14. troškovi izleta i ekskurzija,
15. drugi troškovi regulisani odlukom Savjeta o visini cijena usluga i drugih troškova na Univerzitetu.

OSNOVI ZA DODJELJIVANJE STIPENDIJE / POPUSTA ZA ŠKOLARINU

Član 3.

Dodjelu stipendija studentima Univerzitet vrši raspisivanjem Konkursa za dodjelu stipendija u kome se propisuju uslovi za ostvarivanje prava. Savjet Univerziteta donosi odluku o visini budžeta za stipendiranje.

Član 4.

Univerzitet dodjeljuje pravo na stipendiju i utvrđuje visinu stipendije za studente osnovnih akademskih studija po sljedećim osnovima:

1. uspjeh na prijemnom ispitu;
2. uspjeh na osnovu prosjeka tokom školske godine;
3. socijalnom osnovu;
4. stipendije za članove porodice zaposlenika Univerziteta;
5. stipendije za svršeničke srednjih škola u okviru Islamske zajednice u Srbiji;
6. stipendije za djecu obolelu od teških i rijetkih bolesti;
7. namjenske stipendije donatora.

Član 5.

Prvi osnov za stipendiranje je stipendija brucovima na osnovu uspjeha na prijemnom ispitu tokom prvog upisnog roka. Ova stipendija se primjenjuje za sve studijske programe za koje je raspisan konkurs na osnovnim akademskim studijama za određenu školsku godinu.

Po ovom osnovu kandidat sa najvećim brojem poena na prijemnom ispitu za jedan studijski program dobija popust na školarinu od 50%, drugoplasirani dobija popust na školarinu od 20% i trećeplasirani dobija popust na školarinu od 10%.

Ukoliko dva ili više studenata imaju isti broj ostvarenih poena na julsom prijemnom ispitu za određeni studijski program, stipendija će se podijeliti na broj studenata sa istim brojem poena, pod uvjetom da iznos stipendije bude za minimalno 5% veći od nižeplasiranog.

Ukoliko Univerzitet ili partnerska institucija obezbjeđuju posebne stipendije za jedan studijski program, dodjela stipendija iz stava 2. ovog člana se ne primjenjuje.

Detalji o organizaciji prijemnog ispita objavljuju se na zvaničnoj internet stranici Univerziteta.

Član 6.

Drugi osnov jeste stipendija za najbolje studente na određenom studijskom programu osnovnih akademskih studija tokom jedne školske godine.

Po ovom osnovu, student koji ima najbolji prosjek u odnosu na sve studente na određenom studijskom programu, dobija popust u iznosu od 80%, drugoplasirani dobija popust na školarinu od 40% i trećeplasirani dobija popust na školarinu od 20%.

Ukoliko dva ili više studenata imaju isti prosjek, a najbolji su studenti tokom školske godine na određenom studijskom programu, stipendija će se podijeliti na broj studenata sa istim prosjekom, pod uvjetom da iznos stipendije bude za minimalno 5% veći od nižeplasiranog.

Pri primjeni prava na stipendije iz stava 1. ovog člana, razmatraju se samo ocjene iz februarskog, junskog i septembarskog ispitnog roka, uz uvjet da je na ovim ispitnim rokovima stekao minimalno 60 ESPB.

Član 7.

Treći osnov jeste stipendija za socijalno ugrožene studente na Univerzitetu. Broj ovih stipendija se određuje na Savjetu Univerziteta prije početka školske godine. Redoslijed prijavljenih kandidata se vrši prema broju osvojenih poena na osnovu sljedećeg algoritma:

1. Primanja domaćinstva u kojem student živi. Ukoliko domaćinstvo nema sopstvena primanja, tada se ova činjenica vrednuje sa 12 poena. Ukoliko domaćinstvo ima primanja, broj poena se određuje prema sljedem obrascu:

$$Poeni_{primanja} = \frac{300000}{mjesecna\ neto\ primanja\ domaćinstva\ u\ RSD}$$

Ukoliko je potvrda o primanjima izdata u stranoj valuti, konverzija se vrši prema srednjem kursu Narodne Banke Srbije prema datumu izdavanja potvrde.

2. Stambeni status studenta. Ukoliko živi u zajedničkom domaćinstvu, ova činjenica se vrednuje sa pet poena. Ukoliko rentira stan radi studiranja, ta činjenica se vrednuje sa osam poena.
3. Broj lica u zajedničkom domaćinstvu. Za određivanje poena po ovom pokazatelju se množi broj lica u zajedničkom domaćinstvu sa faktorom dva.
4. Porodični status. Ukoliko je student bez oba roditelja, činjenica se vrednuje sa 10; ukoliko je bez jednog roditelja sa 6; ukoliko ima oba roditelja sa 4 poena.
5. Prosjek ocjena. Kod studenta prve godine studija, prosjek se određuje zbirom prosjeka svih četiri godine iz srednje škole, gdje se zbir dijeli na dva. Za studente druge, treće i četvrte godine se uzima u obzir ostvareni prosjek u prethodnoj školskoj godini, gdje se uzimaju u obzir samo ocjene iz februarskog, junskog i septembarskog ispitnog roka, uz uvjet da je na ovim ispitnim rokovima stekao minimalno 60 ESPB.

Rangiranje se vrši na osnovu najvećeg broj osvojenih poena.

Član 8.

Zaposlenici Univerziteta i članovi njihovih porodica, članovi porodice i zaposlenici institucija u okviru Islamske zajednice u Srbiji, imaju pravo na 10% popusta na školarinu za osnovne akademske studije.

Bivši zaposlenici Univerziteta, čiji član porodice studira na Univerzitetu, imaju pravo zadržati stipendiju iz stava 1. ovog člana za školsku godinu u kojoj je zaposlenik radio na Univerzitetu.

Ukoliko roditelj, odnosno staratelj, koji ne spada u kategoriju prema stavu 1. ovog člana, upisuje drugo dijete na jedan od studijskih programa osnovnih akademskih studija Univerziteta, dobija popust na školarinu od 10% za drugo i svako naredno dijete.

Kod određivanja stipendije iz stava 3. ovog člana bitna je činjenica da li je prvi student aktivan ili uspješno završio osnovne akademske studije na Univerzitetu.

Član 9.

Svršenici srednjih škola u okviru Islamske zajednice u Srbiji imaju pravo na popust od 10% školarine. Izuzetak je slučaj kada svršeni srednje škole stekne pravo na drugu stipendiju u većem iznosu od ove iz Pravilnika, ali je mogućnost sabiranja stipendija isključena.

Član 10.

Namjenske stipendije se dodjeljuju shodno sporazumu između Univerziteta i donatora sa jasno definisanim kriterijama.

Član 11.

Studenti master akademskih studija nemaju pravo na stipendije iz člana 5., 6., 7., 8. i 9. ovog Pravilnika.

Zaposlenici Univerziteta, koji su studenti master akademskih studija, mogu dobiti beskamatni kredit za plaćanje ukupne školarine na 24 rate.

Član 12.

Studenti doktorskih akademskih studija nemaju pravo na stipendije iz člana 5., 6., 7., 8. i 9. ovog Pravilnika.

Zaposlenici Univerziteta, koji su studenti doktorskih akademskih studija, mogu dobiti beskamatni kredit za plaćanje ukupne školarine na 60 rata.

Član 13.

Studenti svih nivoa studija, koji uplate cjelokupni iznos godišnje školarine tokom perioda upisa za školsku godinu dobijaju popust u iznosu od 10%.

PRAVILA DODJELJIVANJA STIPENDIJA, PRAVA I OBAVEZE STUDENATA

Član 14.

Student koji je dobio stipendiju po jednom osnovu ne može dobiti stipendiju po drugom osnovu.

Član 15.

Studenti osnovnih akademskih studija koji su ostvarili pravo na stipendiju imaju obavezu da u slučaju ukazane potrebe, obavljaju određene vannastavne, praktične i druge aktivnosti u utvrđenom sedmičnom fondu sati, a sve u cilju njihovog naučnog i stručnog usavršavanja. Evidencija o obavljanju aktivnosti iz prethodnog stava vršit će se na posebnim obrascima koj propisuje Univerzitet, a nadzor nad provođenjem aktivnosti i obaveza studenta vršit će odgovorno lice na nivou Univerziteta u saradnji sa departmanom u okviru kojeg je student upisan.

Član 16.

Studentu – nosiocu stipendije protiv kojeg je vođen disciplinski postupak i konačnom odluko nadležnog tijela utvrđena disciplinska odgovornost, umanjuje se stipendija ovisno od težini disciplinske povrede i to:

1. ako se radi o lakšoj disciplinskoj povredi, studentu se umanjuje stipendija u izno do 10% godišnje školarine;
2. ako se radi o težoj disciplinskoj povredi, studentu se umanjuje stipendija u izno do 30% godišnje školarine.

KOMISIJA ZA OCJENU STIPENDIJA

Član 17.

Ocjenjivanje ispunjenosti uslova u pogledu visine postojećih stipendija studenata Univerziteta, kao i odlučivanje o smanjenju, odnosno povećanju stipendija u skladu sa kriterijima propisanim ovim Pravilnikom, provodi posebna komisija koju imenuje Senat Univerziteta na prijedlog Rektora.

Komisija iz stava 1. ovog člana ima pet članova, a može biti imenovana i kao stalna.

Komisiju sačinjavaju generalni menadžer kao predsjednik, jedan prorektor, jedan predstavnik rukovodioca departmana, jedan predstavnik nastavnika, te jedan predstavnik iz reda administrativnog osoblja Univerziteta.

Predstavnik studenata kojeg delegira Studentski parlament Univerziteta ima pravo sudjelovati na radnim sastancima komisije.

Član 18.

Komisija se obavezno sastaje i analizira stanje ispunjenosti uslova u vezi stipendija nakon završetka popravnih ispita u ljetnom semestru svake akademske godine.

Preliminarnu rang listu o visini stipendija za narednu akademsku godinu komisija usvaja najkasnije 15 (petnaest) dana od dana objavljivanja rezultata posljednjeg ispita u septembarskom ispitnom roku.

Student – korisnik stipendije ima pravo prigovora RektorU Univerziteta u roku od 8 (osam) dana od dana objavljivanja preliminarne liste.

Odluka po prigovoru se donosi u roku od 3 (tri) dana od dana podnošenja prigovora i ima svojstvo konačnosti.

Konačnu rang listu o visini stipendija za narednu akademsku godinu komisija usvaja najkasnije 30 (trideset) dana od dana objavljivanja rezultata posljednjeg ispita u septembarskom ispitnom roku.

Konačna rang lista se objavljuje na oglasnoj tabli Univerziteta.

Član 19.

Ovaj Pravilnik stupa na snagu od dana donošenja.

PREDSJEDNIK SAVJETA UNIVERZITETA

